

TEKS UCAPAN
YH PROFESOR DATO' DR. DAING NASIR IBRAHIM
NAIB CANSOLOR UNIVERSITI MALAYSIA PAHANG
SEMPENA
MAJLIS SAMBUTAN HARI RAYA AIDIL FITRI UNIVERSITI MALAYSIA
PAHANG 1429H PADA HARI KHAMIS, 23 OKTOBER 2008, PUKUL 10.00
PAGI DI KOMPLEKS SUKAN, UNIVERSITI MALAYSIA PAHANG

SALUTASI

Yang Berusaha Saudara Pengacara Majlis;

Yang Berbahagia Dato' Abdul Aziz bin Abdul Rahman,
Ahli Lembaga Pengarah Universiti Malaysia Pahang;

Yang Berbahagia Timbalan-timbalan Naib Canselor;
Pendaftar, Bendahari dan Ketua Pustakawan;

Profesor-profesor, Dekan-dekan dan Ketua-ketua Pusat Tanggungjawab;

Saudara Mohammad Suffi bin Kamari,
Yang Dipertua Majlis Perwakilan Pelajar;

Dif-dif jemputan dari agensi kerajaan, industri, media dan tokoh-tokoh masyarakat;

Tuan-tuan dan puan-puan;

Para tetamu yang dihormati sekalian.

Assalamualaikum warahmatullahi wabarakatuh
dan Salam Sejahtera.

KATA PEMBUKA

1. Terlebih dahulu marilah kita sama-sama merafakkan setinggi-tinggi kesyukuran ke hadrat Allah Taala yang telah memberikan keizinan dan kekuatan kepada kita untuk memeriahkan Majlis Sambutan Hari Raya Aidil Fitri Universiti Malaysia Pahang 1429 Hijrah.
2. Sebagai tuan rumah, saya dan seluruh warga UMP mengucapkan selamat datang kepada para tetamu sekalian ke majlis pada hari ini. Secara khususnya, UMP mengalu-alukan kedatangan Yang Berbahagia Dato' Abdul Aziz bin Abdul Rahman, Ahli Lembaga Pengarah Universiti yang turut sudi hadir. Insya-Allah, kehadiran Yang Berbahagia Dato' dan para dif sekalian akan menyemarakkan lagi kemeriahan dan keceriaan majlis pada pagi ini.
3. Pada kesempatan ini juga, masih belum terlewat untuk saya mengucapkan Selamat Hari Raya Aidil Fitri dan Maaf Zahir dan Batin kepada para hadirin sekalian. Sambutan Hari Raya Aidil Fitri yang kini melewati tarikh 23 Syawal 149 Hijrah disambut dengan penuh kesyukuran oleh kita sekalian.

MEMPERKASA JALINAN KERJASAMA

4. Tuan-tuan dan puan-puan,

Majlis Sambutan Hari Raya Aidil Fitri UMP 1429 Hijrah yang diadakan ini membuka ruang dan peluang bagi warga Universiti ini dan masyarakat luar berinteraksi dalam suasana santai dengan penuh kemesraan.

5. Pelan Strategik UMP 2008-2010 yang kini dalam peringkat pelaksanaan telah menekankan aspek akses dan sosioekonomi serta meningkatkan kerjasama menang-menang sebagai antara Faktor Kritikal Kejayaan atau CSF yang memerlukan perhatian strategik Pihak Pengurusan Universiti ini. Sesebuah Universiti perlulah dilihat aksesibel dan mesra pelanggan. Persepsi dan *impression* daripada para pelanggan dan pemegang taruh UMO ini amat signifikan dalam konteks pemerksaan jenama dan wibawa Universiti ini.

6. Justeru, majlis pada pagi ini adalah suatu medan separa-formal yang membolehkan ruang interaksi dan komunikasi yang telah sedia terbuka diperkasakan lagi bagi manfaat Universiti ini dan pihak luar. Universiti Malaysia Pahang amat menghargai peranan penting yang telah dimainkan oleh pelbagai agensi kerajaan, pihak industri, media dan masyarakat dalam membantu Universiti ini dan melalui majlis pada pagi ini, UMP

mengiktiraf sumbangan yang telah diberikan oleh pihak-pihak berkepentingan ini.

7. Bagi memantapkan lagi jalinan kerjasama dan jaringan strategiknya, UMP akan terus komited untuk meneroka ruang dan peluang baharu yang boleh dimanfaatkan demi kepentingan bersama. Dalam konteks ini, memasyarakatkan UMP bersama komuniti secara berkesan supaya kehadirannya dirasai adalah suatu cabaran kepada seluruh warga Universiti ini. Universiti seharusnya berupaya memainkan peranannya sebagai ejen perubahan dan peneraju pembangunan negara dan masyarakat. Hanya dengan itu rakyat dan masyarakat akan merasai kepentingan dan manfaat kewujudan sesebuah Universiti kepada mereka.

UCAPAN PENGHARGAAN

8. Tuan-tuan dan puan-puan sekalian,

Sebelum mengakhiri ucapan ini saya sekali lagi mengucapkan terima kasih kepada para tetamu jemputan yang telah sudi memenuhi jemputan Majlis Sambutan Hari Raya Aidil Fitri UMP pada hari ini. Saya berharap tuan-tuan dan puan-puan gembira dan berpuas hati dengan layanan kami dan saya menjemput tuan-tuan dan puan-puan untuk menikmati juadah yang telah disediakan.

9. Saya juga ingin merakamkan ucapan penghargaan kepada warga kerja UMP daripada semua Pusat Tanggungjawab yang telah menggembleng masa dan tenaga bagi memastikan kelancaran majlis pada hari ini. Majlis yang begitu ceria, meriah dan berwarna-warni ini adalah manifestasi perpaduan dan kerukunan warga Universiti ini.

KATA PENUTUP

10. Akhir kata, saya berdoa mudah-mudahan perjalanan majlis pada hari ini diberkati oleh Allah Taala dan kepada-Nya juga kita memohon semoga warga Universiti Malaysia Pahang dilimpahi taufik hidayah dan kekuatan untuk memandu Universiti ini ke arah kecemerlangan.

Selamat Hari Raya Aidil Fitri, Maaf Zahir dan Batin;

Sekian wabillahi taufiq wal hidayah,

Assalamualaikum warahmatullahi wabarakatuh.